

23/04/2025

Aizawl

1830 Hrs

REGIONAL NEWS

HEADLINES:-

1. Larsap General (Retd) Vijay Kumar Singh an loneitute'n supply chain mumal tak, kharchhawng inrawlh lohna tur an neih a pawimawh a ti.
2. LADC a ZPM Sorkar chu a nghing a, BJP kaihhruai United Legislature Party ten sorkarna siam an tum mek.
3. Ministry of Home Affairs chuan Lengpui Airport venhim hna thawk turin Central Industrial Security Force a a dah a, naktuk atangin hna an thawk tan ang.
4. Union Home Minister Amit Shah-a chuan vawiin khan Pahalgam-a firfiakte chetna hmun Baisaran ngaw hmun tlawhin thil thelna dan a enfiah.

<><><>

GOVERNOR

Larsap General (Retd) Vijay Kumar Singh chuan loneitute'n hlawkna tam zawk an dawn theih nan supply chain mumal tak, a kara midang inzep leh hlawkna tam zawk hlep thin an awm loh nana ruahman a pawimawh thu a sawi.

Vawiina Agriculture leh Horticulture Department hotute nen Raj Bhavan-a an inkawmnaah he thu hi sawiin Larsap chuan daih rei zawka lo nei tura hmalak a tul thu a sawi a. Hmalakna tlo leh tluantling, thing leh mau tichereu lo leh leilung tichhe lo thei ang bera eizawna kalpui a tul tih sawiin hei hi tun mai nilo nakin hun thlenga pawimawh a ni, a ti. Fertilizer tel lo thlai thar chhuah kawngah tan lak nasat a tul thu a sawi a, organic thlai a ni ngei a ni tih finfiahna hmun, Laboratory leh standard tha tak state puala neih a tul thu a sawi bawk.

Inkawmhonaah hian Agriculture Department leh Horticulture Department hnuaia Scheme hrang hrang hnuaia hmalakte thlir ho a ni a. Organic state ni thei tura pawimawhte sawiho niin, thlai hrisel tam zawk thar kawnga hmalak tulte bakah a sawngbawlina kawnga tanlak ngaihna laite sawiho a ni.

<><><>

MHIP ELECTS

Mizo Hmeichhe Insuihkhawm Pawl (MHIP) President thar atan Pi Lalliani, Aizawl Khatla veng chu thlan tlin a ni.

Aizawl Vanapa Hall-a MHIP General Assembly Vawi 24-na hman mekah vawiin chawhnu khan kum 2025 atanga kum 2027 chhunga MHIP hruaitu tur thlan a ni a. President atan Pi Lalliani thlan a ni a, Vice President atan Pi Ngurmawii Sailo, General Secretary atan Prof. Irene Lalruatkimi, Assistant Secretary atan Prof. Zokaitluangi, Treasurer atan Pi Vanlaldiki leh Finance Secretary atan Pi Lalthanmawii te thlan an ni a. Inthlanna hi Central YMA hruaituten an buaipui a ni.

MHIP President thar Pi Lalliani chuan Akashvani zawhna chhangin MHIP te chu an kal zelna turah inlungual taka an kal a duh thu a sawi a. Social Welfare & Tribal Affairs department te nena tanghoin hmeichhiate zinga ruihhlo hluar tihrem kawngah branch hrang hrangah hma an lak mek

thu leh hei hi a ngaihpawimawh thu a sawi a. Mizo hmeichhia ten an tu leh fa te an enkawl danah leh Mizo hmeichhia ten an inchei dan leh an nun an hman danah hmalak tula a hriat thu a sawi a. Naupang te dikna chanvo humhalh pawh a ngaihpawimawh thu a sawi.

<><><>

UNION MOS

Union Minister of State for Planning, Statistics and Programme Implementation leh Minister of State for Culture, Pu Rao Inderjit Singh chuan Hnahthial District tlawhin Hnahthial District chhunga Central scheme hrang hrang kalpui a nih dan chu official-te nen an thlir ho a, Scheme hrang hrang kalpui a nih danah mamawh awmte zawtin India ram chu chawisan a nih theih nan Mizoram tih hmasawn chu thil pawimawh tak a nih thu a sawi.

Pu Rao Inderjit Singh chuan Mizoram chu dan leh hrai kenkawh kawngah fakawm a tih thu leh India ram chhunga state ralmuang berte zing ami a ni chu fakawm a tih thu a sawi a. Hnahthial District chhunga central schemes kalpui dan hriat chian chu a rawn kal chhan ber a ni tiin Hnahthial District mai bakah Mizoram pumpui tih hmasawn chu an tum ber a nih thu a sawi.

Union Minister of State hi vawiin tlai khan Delhi panin a haw nghal a ni.

<><><>

LADC ZPM

Lai Autonomous District Council a ZPM Sorkar chu a nghing a, BJP kaihhruai United Legislature Party te chuan an hruiatu M.Kawnpui bialtu MDC, Pu N.Zangura hovin vawiin tlai khan Governor hmuin, LADC ah Sorkarna an siamtheih thu thlenin, Sorkarna siamtir turin an ngen.

LADC 11-na term kallai ah Sorkar inthlak vawi thum thleng tawhin, tuna ZPM Sorkar hi thlak a nih leh chuan Sorkar inthlak tum li na tur a ni dawn a ni.

Kan corr report lo ngaithla ang.

Tuna ZPM hruiatu, Chief Executive Member Pu V. Zirsanga hi kumin February 27 khan CEM atan lakluh a ni a, a hnu March 17 khan Executive Member pakua lakluh an ni leh a, Sorkar dinglai chuan Emergency Session pawh April 17 atanga 22 khan paltlangin Budget pawh passed a nih hnu ah, eptu lam tangrual, MNF, MDC 11, ZPM, MDC 2 leh Congress MDC 1 an vaiin MDC 14 te chuan ZPM atanga BJP zawmta Pu N.Zangura kaihhruaina hnuaiah LADC ah Sorkar din tumin hmalakna hi an kalpui mek a ni.

LADC ah hian mipui thlan MDC 25 awmin, CEM rawtna anga Governor in member atan a ruat 4 nen Member 29 an awm mek a, tun dinhmun ah Elected Member 25 ah United Legislature Party chuan pawnlam atanga an mahni thlawptu Congress MDC pakhat nen Member 14 an nei mek niin an insawi a, ZPM lam chuan MDC, 11 an nei mek a ni.

Tukin khan LADC a Sorkar-na siam tur chungchang Joint Legislature Party meeting chu Aijal Club-ah BJP Mizoram State President Pu Vanlalhmuaka kaihhruaia neih a ni a, he hunah hian MNF Party atangin Pu Robert Romawia Royte MLA, BJP atangin Dr K Beichhua MLA leh Pu Delson Notlia MDC, BJP National Minority Secretary te telin, LADC MDC Member 13 leh Nominated Member 1 te nen an vaiin Member 14 an tel a ni.

BJP Mizoram thuchhuah tarlan danin, Lai Autonomous District Council (LADC)-ah hian ZPM chhuahsana BJP a lut ta MDC pahnih (2) te leh MNF MDC 11, ten Sawrkarna hi an siam dawn a. Congress MDC 1-in pawnlam atanga a thlawp dawn avangin LADC ah hian Joint Legislature, BJP Led Government Sorkar tha tak mipui Sorkar siam a ni dawn a ni.

Aijal Club-a Joint Legislature Party meeting chuan Pu N. Zangura ZPM chhuahsana BJP zawmtu, M. Kawnpui bialtu MDC chu Legislature Party Leader-ah lungruak taka thlan a ni a, vawiin vek hian Governor hnen ah LADC a BJP Led Government siam anih theih thu thehluk nghal a ni bawh a ni.

LADC a ZPM MDC Pu Zirsanga kaihhruai Sorkar na kalpui mek hi Floor test paltlanglo an nih avangin Mizoram Governor chuan Sorkarna siam tur chuan Dan ang ngei a Floor test paltlang angaih thu a hriattir a, Pu Zirsanga kaihhruai ZPM hian Budget Session nei mek in, Mizoram Governor chuan Floor test pal tlang lova Executive hmalakna reng reng chu dan kalh anih thu hrihlin arang thei ang ber a Floor test nei turin hriattirna lehkha a pe a, chuutihlain vawiin a MDC Member 14 te hian tun a LADC a Sorkar ah hian rinna an nghat thei lova, Joint Legislature dina BJP Led Government din mai tha a an hriat avangin Member 14 te chuan nizan khan Aizawl rawn pan nghalin, tukin ah BJP leh MNF te chuan Joint Legislature din in Pu N Zangura chu Leader atan lungruak takin an thlang ta a ni.

<><><>

CISF TO TAKE OVER AIRPORT SECURITY

Ministry of Home Affairs chuan Lengpui Airport venhim hna thawk turin Central Industrial Security Force a ruat thar a, he hna hi naktuk atangin an thawk tan ang.

CISF ten Lengpui Airport naktuk atanga venhim hna an thawh bultanna leh anmahni lawmna hun buatsaih hi Mizoram DGP Anil Shukla chuan a hmanpui dawn a, CISF hian ramchhunga hmun hrang hrang Airport ah venhimna hna anlo thawk tawh thin a, Lengpui Airport hi Airport 69 an enkawlna tur a ni.

Lengpui Airport thuneitute tarlan danin CISF Unit lokal tur te hi an vaiin 214 an ni a, amaherawhchu an awmna hmun tur peih fel ala nih loh avangin CISF Unit zinga 121 an lo kal phawt dawn a ni.

India hmarchhaka awm Mizoram hi thenawm ram Myanmar leh Bangladesh ri-a awm anih avangin India Act East Policy tih hlawhtlin nan a pawimawh hle a, state lian nilo mahse Southeast Asia te nena sumdawnna inthlunzawmna atan pawimawh tak anih avang hian sawrkarn laipui pawhin ngai pawimawhin hmasawmna hrang hrang a thlen tir tawh a, tuna Lengpui Airport CISF in an enkawl tur pawh hi hmarchhak state-a venhimna a that lehzual zawk theihna tura ruahman niin hei hian ramchhungah remna leh muanna a thlen beisei a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

LALCHHINGPUIA

Akashvani Aizawl station-a Library Incharge hna atanga pension Pu Lalchhingpuia, Aizawl Mission Venga cheng chu nizan khan a thi.

Pu Lalchhingpuia hi a phirpui Pu Phirdailova nen Mizo zinga phir la dam upa ber nia mite hriat hlawh an ni a. Kuminah hian kum 91 an tling a ni. Pu Lalchhingpuia hi kum 1966-a All India Radio Station hawn a nih khan a thawk tan a. A tirah peon hna thawkin a hnuah hna hrang hrang a chelh kual a. Library in-charge hna a chelh laiin a pension a ni.

<><><>

PHE MINISTER

PHE Minister Prof. Lalnilawma chuan Greater Lunglei Water Supply Scheme (GLWSS) tihchangtlun hna thawh mek chu chak taka kalpui a nih theih nan department leh contractor-te chu theih tawp chhuah turin a chah.

Wawiina Lunglei khawpui tui lakna GLWSS hmun Pialthleng leh Tlawng lui a tlawhnaah he thu hi Minister chuan sawiin Tlawng tui khuah hna thawhna AMRUT 2.0 sum chu a chhuah thuai theih nan Mizoram sawrkar chuan central lam dawrin, an nawr reng tih a sawi a ni.

Lunglei tui lakna, GLWSS tihchangtlunna tur hian thuang hnihin hma lak mek a ni a. Kum 2054 thlenga mihring nuai 1 sing 1 sang 1, 827 chawm thei tur, Tlawng leh Pialthleng lui atanga tui lakna tur ruahmanna, SASCI 2024-2025 sum cheng vaibelchhe 55.7 senga bul tan chhoh mek a ni.

<><><>

I&K

Union Home Minister Amit Shah-a chuan vawiin khan Pahalgam-a firfiakte chetna hmun Baisaran ngaw hmun tlawhin thil thelna dan a enfiah a. Anantnag Hospital-a hliam tuar enkawl mekte a tlawh bawk a ni.

Thudawn danin Jammu & Kashmir-a Pahalgam-a firfiakte chetnaah hian khualzin 26 kahhlum an ni a. Midang engemawzatin hliam an tuar. Pahalgam hi Srinagar headquarters atanga km 85 a hla, Anantnag district chhunga awm niin nimin chawhnu lam khan firfiakte hian khualzinte hi an bei a. Mitthi zingah hian rampawn mi pahnih leh Kashmiri pahnih an tel a ni.

President Droupadi Murmu-i chaun Pahalgam-a firfiakte chetna chu a dem thu sawiin vanduinna tawh chhungte a tawrhpuithu a sawi a. Prime Minister Narendra Modi pawhin firfiakte chetna chu a dem thu leh he pawikhawihnaa mawhphurtute chu chhuah an ni lo ang a ti. Saudi Arabia tlawha zin PM Modi hian a cham hun chung pawt tawiin nizan khan a lo thlawk haw nghal a ni.

Khawvel ram hruaitute pawhin Pahalgam-a firfiakte chetna chu an dem thu an sawi a. US President Donald Trump-a chuan Prime Minister Modi leh India mipuite a tawrhpuithu leh puih an ngaihna apianga pui tura a inpeih thu a sawi a. US chuan firfiakte dona kawngah India chu a thawhpui reng ang a ti bawh.

Russia President Vladimir Putin-a pawhin Pahalgam-a firfiakte chetna chu a dem thu a sawi a. Pawikhawihntute na taka hrem an nih ngei a duh thu a sawi a ni.

UAE pawhin Pahalgam-a firfiakte chetna chu an dem thu an sawi a. Anni bakah hian New Delhi-a Iran embassy pawhin firfiakte chetna chu an dem takzet tih thuchhuah siamin an tarlang a ni.

<><><>

PARTY LEADERS CONDEMN

Ramchhunga Political party hruaituten Pahalgam-a firfiakte chetna an dem thu an sawi. Union Minister leh BJP President JP Nadda chuan civil mi pawisawi lo bituma dawihzep taka chetna chu a dem thu a sawi a. Narendra Modia sawrkar cuan firfiakte lakah ngaihnathiamna engmah a nei lo tih sawiin tuna pawikhawihhtute pawh chhuah an ni lo ang tih a sawi.

Defence Minister Rajnath Singh, Union I&B Minister Ashwini Vaishnaw leh Union Minister leh LJP (R) Chief Chirag Paswan te pawhin an dem thu an sawi a.

Congress hruaitu Mallikarjun Kharge chuan fifiakte chetna chu a dem thu sawiin rampumin inpumkhata ramria firfiaka chetna an do a ngai tih a sawi a. Lok Sabha Opposition Leader Rahul Gandhi pawhin Pahalgam-a firfiakte chetna chu demin mi dawihzep an nih thu leh rampumin inthurualin firfiakte an beih a tul thu a sawi.

West Bengal Chief Minister Mamata Banerjee leh Samajwadi Party chief Akhilesh Yadav, Tamil Nadu CM M K Stalin te pawhin he pawikhawihna hi an dem thu an sawi bawk a ni.

<><><>